



^ 16
2793
10



16
2793
10

空同子集

卷之四十三

北郡李夢陽撰 東莞鄧雲霄歛潘之恒蒐校

文類四之三 碑文三

將仕郎平陽府經歷司知事贈儒林郎翰林院

修撰康長公墓碑

明故監察御史涂君墓碑

武鄉縣武君墓碑 太康縣安氏瑩碑

真樂翁墓碑

明故例授宣武衛指揮使張公墓碑

權博施墓碑

勅賜愍節祠碑

昭和十九年
六月廿八日
購求

右次碑文八首

碑文三

將仕郎平陽府經歷司知事贈儒林郎翰林院修撰康長公墓碑

純皇帝時靈臺有楊生名重長安有李生名錦二人者皆與武功人康長公遊康長公之與二人者友也於是并稱爲關內三才云余曩游關內見秦父老頗采其事實碑曰康長公名鏞字振遠其先固始人也其七世祖曰康政始遷武功居長寧里政生廷瑞於元仕爲學官廷瑞生世睦世睦生珙珙生汝楫汝楫初爲武功學官高皇帝時辟之爲燕王府長史後出爲安岳縣知縣文皇帝旣興乃召安岳縣知縣爲行部侍郎留北京輔皇太子而侍郎有大勲德文皇帝將封之爲侯侍郎固死不拜比死又上表乞勿賜贈秩蔭上竟皆允之語載康氏家傳侍郎者康長公之曾祖也侍郎生三子長曰爵次曰年次曰禋文皇帝一日盡召侍郎家諸男子侍郎中子會賈在外惟二子在於是二子乃大恐並匍匐入見上上曰汝非康侍郎兒邪二子免冠首觸地對曰然上聞而憐之顧左右曰令侍郎在直不此耳於是卒

空同集
官其二子以爵爲上林苑監正以禮爲監副已知侍郎有子賈在外上拊髀太息曰薄福薄福於是詔賜侍郎子千金錘數十千緡勅關津吏往來不得詰侍郎子於是關中鉅貴族咸推轂康氏而康氏因遂豪關中矣侍郎葬於縣北卜家原至昭皇帝時始贈資善大夫工部尚書云監正累官至中議大夫贊治尹南京太常寺少卿卒葬江寧縣新亭南而太常生健睿皇帝時又有詔起尚書孫應祠者於是健來送銓部會健著田間冠由部甬道入及見部尚書又抵長揖不拜部尚書怒以爲慢已廼竟授通政

司知事而歸而得食半俸祠知事卒葬于縣南紙坊原而知事有五子其長康長公也康長公生而孝友八歲而善文辭及長而好辯有口然習識當世之故好稱先王則古昔於是關中人士咸出康長公下雖康長公亦自謂關中人士弗已若也年二十餘從其先太常就辟試南京顧數不第已乃還關中卽又試關中又不第乃後歲貢至太學至太學又試又不第然太常業已葬南京於是乞爲南京太學生云而卽其故太常之域祠焉然自是不復有試志矣是時楊生李生亦皆阨塞弗庸於世關中父老語曰古人有

言勿爲曉曉人將缺焉勿爲皚皚人將污焉三子之
謂矣康長公旣與時不合於是始好莊老浮屠等書
及外家傳語其言曰夫人以形骸處大壤其速絕若
飄風也予行年五十有四矣吾日以思功名之會是
益速絕而已夫孩提于班白期甚遠今忽忽若瞬息
卽能至百歲政少半耳京生有言孰易如葦孰化如
燬言生死易至也夫喜生者欲心恒安逸也君子疾
沒世而名不稱傷功名之不立也夫功名于身至疏
也古之人以死効此者以可萬世不與物朽至厚身
也今不得之功名又因以勞費心體是非喜生之道
耳故曰百人射招無弗中矣百物誘生無弗傷矣夫
乃今于吾可以已矣乃遂自謂爲已菴已菴者止於
闇也康長公故以懼悸病心乃後上銓部試會墜馬
乃復病顧愈益甚比試心怔怔怦怦不能措一辭於
是除平陽府知事逾年平陽君棄其官而歸而心病
未間也已又病痿又二年所竟卒葬于紙坊原之墓
而平陽君有二子長曰阜次曰海阜先平陽君卒平
陽君且卒子海侍平陽君執其手而泣曰夫予先大
聖人之苗裔也至吾祖嘗樹功名於草昧之際世有
顯官聞人豪于關中今絕於予乎汝如有知其無忘

吾祖矣夫欲心恒安逸者爲其可以貪命而樂存至
厚生也今吾棄功名之會不赴又不欲勞費心體非
於身疏也今病痿乃且死諺曰斷酒白首舖糟而朽
是天乎是天乎雖然吾無面見吾祖于地下矣小子
勉哉平陽君卒十年而海舉進士第一爲翰林院修
撰儒林郎四年而當正德元年今上上徽號兩宮
推贈平陽君如其子官云又二年海有母太安人喪
於是海有友曰北郡李生適自河南來而留滯京師
於是作平陽君墓碑李生曰先民有言期年樹穀百
年樹德曷觀康尚書今其子孫舖勲而啜積曷使人
誦其義無窮如此哉夫平陽中衰之遺裔也能不藉
尺寸而洞視往古凌駕時輩亦謂之振世雄豪者矣
使其遭遇脫穎而嚮用魏衛將相之業尚足道哉其
銘曰維武王建侯衛邦厥有固始武功是祀嗚呼遐
哉尚書開國不伐帝懷其德澤流于孫子少卿明禋
亮采通政明夷乃續其家祀故累基者崇數沃者豐
譬作堂室稼穡而蔀而翔而懋而達夫平陽其屯之
際乎畜而不施以昌厥嗣阜不自秘發鬼神之藏騷
雅並鳴文古而殤嗟嗟平陽舉世重官宦即使君魏
爵而崇位珠玉文綺珍食駟馬有臺樓亭榭孰與發

祥廣志如二子所哉故明不蓄不光流不塞不長武功南原草木膻膻蕃蕃岐渭盤焉平陽宅厥土太安人祔之是曰寧所維厥繩武瞻哉

平陽君生宣德庚戌四月辛未卒弘治壬子正月癸巳年六十有三歲妻張氏封太安人生宣德甲寅三月乙酉卒正德戊辰八月戊寅年七十有五歲男子二人阜先卒年十有八歲海娶尚氏女子一人嫁爲乾州人習五車妻

明故監察御史涂君墓碑

新淦縣南我舟至蓮花潭舟人指岸西廬曰此涂御史居也余聞之呀然於是登岸造其廬見其子朴而問涂御史葬處朴指曰父葬處隔江五里東鄉西廬山是也余望之歔歔已謂朴曰比黜碑于廢寺吳石也曳樹墓道刻表表曰戊辰夏余蓋罹豎瑾禍云余至京師下詔獄乃涂君業先繫獄相見執手問故初瑾以鹽貨源也因遂厚望巡鹽御史貨會一御史入貨如瑾望而瑾輒擬人人必厚貨如望及涂君巡鹽還則空手見瑾瑾怒下君獄然猶日望其貨來也久之貨竟不來瑾愈怒矯詔涂禎打三十棍發肅州衛永遠充軍君坐掠重尋卒無問識不識見君卒無

不嗟歎淚下乃時余尚在獄聞之哽噎者累日食不能下也今大政更新瑾事盡廢格不行人士咸彬彬乎進矣無問識不識語及君又無不嗟歎淚下以寃故禎君名字賓賢弘治己未進士出知江陰縣有卓異績舉天下第一乃於是擢御史云始君下獄江陰人願厚貨入瑾如他御史數塞瑾望解君君不從而朴則曰父幼時嘗讀書玉笥山云篤古持禮諱弘濟者父也早亡而朴仲父曰余兆善使酒觸父父容之仲父以父之容之也反顧驕縱酒然產不出其手於是謀手其產日閔父割父不從會父出仲父輒自主

主產割而手其豐父還祖母不平而怒曰阿兆自主產割而手其豐盍白族長父對曰弟寡活不如兒廩生也父有友丘坤者家貧而有子議聘朴妹矣未決會坤卒父往弔焉語坤妻曰吾女已心許而郎矣勿疑語曰觀其死知終始今豈無皎皎之行爲世所敬誦然矯僞盜名稱身歿而跡彰者多矣此非所謂誠之不可掩邪夫涂君官不過七品壽僅踰四十非赫赫久修之夫也乃今歿士夫思于朝鄉人德于鄉所縣縣人思慕而不忘此豈苟然者邪然余往在詔獄見君日涕泣念母今母存而君則云亡於非命論

者頗疑爲善而無報夫孟子不云夭壽不貳修身以
俟之誠若云云則顏回王通之倫非哉

武鄉縣武君墓碑

武君者武鄉縣人也諱彪字勢雄生二男子長曰威
次曰盛弘治間武威爲扶溝丞三年忽心動卽日趣
治裝歸歸逾月喪其母逾年又喪其父卽武君也縣
喪祭故鮮禮而扶溝丞葬祭其父母則以禮含歛作
木主起祠屋咸創自丞丞又來乞表其父墓余曰嗟
乎武君余聞其人蓋任俠者云成化間武鄉丞張翔
扑殺豪吏王禡而禡父輒呼其家衆圍官寺將禽翔

衆卽又圍武君家武君於是勒其子弟若鄉少年盡
死與王禡家衆敵諭以禍福卒解翔難及後翔以他
事免而武君輒又率其數騎送出境以還張翔謂人
曰生我者武彪也而晉土故堅勁民豪觀史稱蓋聶
代諸白是已今有武君然武君不專以力豪而喜下
賢士夫又曾爲繕梁除道建塾數事而縣俗故苦膏
其畎畝人有老死不紵葛衣統阿者并不見諸純麗
物武君則創導之桑使務紡績今稍稍成效矣前郭
解厚施而薄望振人之命不伐其功史氏嘉焉及若

空同集
孝弟事未著也武君其父病嘗其苦武君喜父病乃尋愈武君生永樂癸卯正月十一日卒弘治壬戌正月十二日年八十歲娶李氏舉人李森女長君六歲先二年卒有孫男子六人云扶溝丞曰我先世太谷人諱建沁州知州始徙武鄉諱祥縣務都監官諱從義山北廉訪司知事諱季良輝州學教授至國朝有諱炳文者爲縣主簿於武君爲高祖

太康縣安氏塋碑

太康縣西岡曰侯陵而安氏塋焉蓋葬者五世矣塋西南塋亦安氏二丘前並七丘後纍纍斜然迷莫知誰墓而今塋四凸而中凹如掌形一世益于安爲高祖益生二子曰居曰全葬之左居三子曰恭曰康曰庠全二子曰慶曰庸葬之右恭子曰柱曰杞康子曰盤曰止曰吉庠子曰樞曰棠慶子曰和葬左前柱子曰清曰深曰浩杞子曰洪止子曰仁曰儻樞子曰鑰葬右前吉子曰行又稍前而安之繇也則自丁氏丁氏者益母也丁氏兄爲元平章官元亂平章官提兵過太康乃挈其妹甥北而丁氏中流矢道死而平章官乃獨挈其甥北已而舅甥復相失而益自轉徙于長子因娶長子張氏亂定夫婦歸乃始鋤荆榛誅茅

藺埽墓丘創室廬亦難矣李子曰今之葬蓋專言地理家云質體鬼徼利福計枯腐饕潤澤君子蓋羞稱焉然中古以來顧率尚之今號稱賢豪人亦徃徃談青烏信眠牛而望氣者言陟侯陵望安氏塋逆推其必盛今考其一世一人二世二人三世五人四世一十二人五世二十二入六世二十八人貴而知州者一人康是已推官者一人吉是已進士知縣者一人仁是已壽而官者一人棠是已義而官者二人國子生者一人縣學生者三人王官者二人吏而未官者三人賢而篤行者世有之揆其言不虛矣而予則謂

人道邇天道遠向使安氏族大而橫富而違禮貴而怙勢譬之本根旣撥枝葉必萎卽令葬者乘生氣據王相陽來陰受支就干合未必盛若是而今人靡察顧時時覓勝地擇利穴冀發其子孫斯何異于弗耕而餒曰天也豈不悖哉左生則又謂予曰行蓋有二男子云長曰邦次曰都峩冠拖紳安門之封胡于今塋樹柏千建堂豎門翼之以屋覆碑以亭爰成父志李子曰甚哉人道之邇也今觀侯陵安遠而彌繁盛而彌賢渢渢乎猶朱陳王謝焉是果地里使之然否歟詩曰孝子不匱永錫爾類安氏之謂矣予旣爲之

碑復系之銘銘曰於維安氏肇自武威漢有安成厥
宗用輝憲英惇傑施及牧丙靖寇康國南土是屏喪
亂中蝕胥淪胥遷碩果不食太康僅延於昭爾祖童
年禍嬰舅挈之北母隕于兵艱難此離危而竟立生
還沒寧嗣衍族集苞桑旣固瓜瓞聿馨有媛者女待
召掖庭暴殂帝驚歸骸特錫綵帛黃金傳馬有駒迺
有推官敬刑明寃實發我祥奕奕言言邑尹罔究予
也實惜策名馳譽孰云匪積雖有弗顯咸敕迺躬氣
滋木茂土腴禾豐種木維蔭種禾維飽勤力者獲勳
德者報彼曰行者于義彌敦約已厚施爰穆群昆二
十章甫如璠履美紉芳孝敬靡諼墓門式啓堂
廡翼翼列柏蒼蒨井逕修直禴蒸是歸族姓攸聚躋
蹌濟濟威儀孔度牛羊載陳壘學苾芬來歆來格優
如有聞里人用欽爰効爰則丘木勿翦過墓者軼

真樂翁墓碑

真樂翁者南宮縣人也字楨夫名榦姓劉氏生正統
十年七月二十二日卒嘉靖元年三月二十三日年
七十有九歲業卜城南十里王村葬矣翁孫曰濂者
舉進士知杞縣徵爲御史過大梁見空同子述翁之
行已而泣而請所弗朽焉于是空同子始知南宮有

是翁也夫世嘗言人有幸不幸者有由然哉遼述之域奇絕之山汪瀆之川靈異之木詭怪之石耳目未之聞見載籍未之紀記文史未之稱述闔焉竟無聞者舉天地間豈少哉而顛珍枝寶隻禽孤獸光色羽毛苟殊于其類一爲人傳播則慕之者求獲之者憐失之者惜豈其物真大殊哉遇有幸不幸耳故蒼蠅驥尾君子譬之斯遷氏發青雲之歎而重傷泥途之難也夫真樂翁者固淳行力道之偉夫也進取志厄功名不著于春秋乃竟蕪沒草莽畎畝間以死使非其孫顯而亟揄揚之斯與遼述之山川木石異邪翁

父諱明母曰崔氏崔之卒也庶母孫理其家事翁事之母君子之言孝也以舜損祥爲至者以其母繼也庶又有間矣而翁母事之不謂淳行哉翁故貧尚儉獨購書不費之愛也每燕居令子孫誦說書史會意便欣然喜曰古之言不難知難于行耳誦之而不行猶不誦也諸子孫環拱曰唯唯翁顧之笑曰樂乎遂自稱真樂翁斯不謂力道者哉道故仁仁故義義故亮直亮直故急難故居也爭者聽其平悖者畏其評暴者沮柔者恃而出也群而和醜而讓見溺則援是皆偉人之行也非一珍一寶一光一色一羽一毛者

倫也然鄉之人知焉矣出其鄉弗知也同其出者知焉矣出不之同者弗知也何也窮僻之邑無青雲之媒幽貞之士鮮驥尾之求故也故予于真樂翁有重歎焉歎者何也悼賢之無聞而慨善之易泯又悲幸也邑之長老曰翁二子曰錫曰鎧錫爲知縣六孫曰濂曰河曰濤曰沱曰藻曰渚濂爲御史不可謂無聞得空同子譔述不可謂泯王村之瑩翁無心而獲地不可謂不幸夫信斯言也則易之視履考祥驗邪卽詩之日監在茲者邪不幸于人而幸之天無聞于身而聞之子若孫遂以之不泯所謂積善餘慶者邪

明故例授宣武衛指揮使張公墓碑

張公者杞人也名廷恩字世榮號雲莊子世居西岡曰張大公者國初自墾地數千畝大公生欽欽生普普娶于胡以景泰元年八月二日生張公初普爲縣學生力行有聞於是徙杞之草營居而以墾地之半分其族亡何夫婦連卒時張公十三歲耳奉遺言權厝其父母喪於郭西公旣孤微然有姨之夫五咸富盛招之使營生公弗從乃返西岡而居會族有橫者欺公少而貧而侵并其墾地之半謀曰渠孤兒耳有言則阱之公聞之怒直于官竟歸我田是時張公

弱冠耳勃勃英氣逼人矣土俗租地畝錢百張公則八十已而曰吾地畝租五十於是人爭來租地無閒者計其入反倍於他由是富盛而張公智負氣用才然又施故布衣雄數郡嘗如杞還西岡單馬袖鐵尺望見人聚路塞問之曰有生馬齧人公立馬上瞪久之下棄馬杖鐵尺步而前而生馬者果奮鬣揚蹄張口來噬公舉尺擊破其頂斃焉神氣自如上馬不顧而去東地嘗水公力主藝稻稻熟水且復至或幸之曰雲莊子智乎公令佃人曰稻第堆之田人雙其堆多則四之又令曰崇土如堆數公旦往第分其稻堆

已堆則標之幟又令紉其秸囤稻崇土上人衆而力齊卒免之水人服其才是歲獲稻數千張氏愈富而盛乃於是時大治屋廬于西岡歸睢曠斥墟莽數盜公之室垣塹重邃是故鈴柝不設而終其身無伏梁遺縑之警雖德其施者印之心亦勢使然耳初公治室造土車百人一車十車一長首止而尾動厥環無端略如水車戽之義齊而均無憂于惰勤其糶倉穀日入錢緡竟無弗明者或問之曰凡倉穀入記之簿予第令一僕主其出如簿數則已又令一僕主入緡緡頭封識其姓名有弗明責之渠也昔人謂世非乏

才顯晦隨遇卽有英雄之倫使青雲是遠驥尾莫附則桑間止于餓夫胯下終于寒士雖有輿負勇登壇效能安所庸哉夫以張公之智之才之力使提十萬橫行匈奴則長城必屹於塞北王庭宜絕於漠南顧歿齒草野臥煙霞獵鹿豕終焉悲夫弘治間輸金二百鎰助邊始授昭勇將軍宣武衛指揮使銜雖出入騶擁位勢甲於鄉人然亦奚益矣今鄉黨每述其輕財之行曰張公遷其父母葬令狐城始相地地主曰畝四十金公卽與四十金旣葬構室固墉森森柏松白燕巢其墓廬嘗歲凶公糶減其直如稔直或貧不

能直約秋成還直秋成或不能還直則約來秋還所直來秋或又不能還直則舍之正德間勦流賊官軍過杞公饋之芻五千居無幾歲凶公助之賑出粟千已而歲又凶公又助賑粟千弗給二子自出粟數百繼焉公聞之喜曰真吾兒也巡撫官兩遣羊酒花紅勞公于杞奉 詔遵例建坊于巷間移文曰仗義竭忠父子同心斯皆其大者如此乃其未試之才深藏之智固有莫之知者正德間惡少有陷公權奸者逮如京公處之裕如竟白還乃竊歎曰先民有言富者怨之藪也豈不信哉予樂施人也乃猶不免於禍羅

况他哉况他哉於是鬻遠田四千畝於人約三年耕有獲還其直復謂二子曰若輩勿忘我志也嘉靖七年饑二子各出粟千二百賑之撫按官以聞奉詔各建坊如其父歲再饑弟出粟千撫按官奏聞自兵馬進指揮使服三品服尋以兄捐金五百請授文職行將復沐恩矣至今如公之里門者見表義之坊父子輝映聞以禮讓稱不以豐財顯則公之善已裕後不可以爲世法乎李子曰仁患其弗義義患其弗勇勇患其弗智智患其弗才今以雲莊子所事觀之果何若人哉夫豐城之氣非華莫識荆山之

遇和始彰故平世則雄伏豹隱亂離則龍翔虎躍人非盡拙時有利鈍然也今觀雲莊子之才智強力不謂之勇邪不義邪仁邪而埋耀草莽竟不一試于世此非時使之邪公以嘉靖三年二月八日卒年七十有五配楊氏淑德懿行無忝內助先公卒子男二長希仁國子生次希義國子生授兵馬進指揮使女五長適孫懷經次王洪運次王尚友俱國子生次馬敷政縣學生次康岳醫官孫男四益祚永祚錫祚俱國子生衍祚女五長適劉喬松縣學生次周世子妃次孫燦次王震亨縣學生次聘許繫周王以姻故

又素知公計聞悼焉遣官如杞祭是年四月十五日
葬公令狐城從父兆也嘉靖八年冬李子作文樹碑

權博施墓碑

權濟字博施澄城縣人也其墓在縣城西十里段莊
社權君盖有男女各三男曰惟均曰惟平曰惟誠監
生也女之壻曰雷頂曰許世昌曰楊復性嘉靖四年
許君以知縣陞開封府通判是時權君沒而葬者三
年矣許君見李子請曰嗟舅氏窆銘矣而墓未表也
敢請於執事者李子曰夫表者揚之名而勸之義也
是故表死以勸生也表其先以勸後也表之鄉勸鄉

也勸鄉以風國也風國風天下也何也人無有不激
之而興者也故表者揚之名而勸之義也許君曰嗟
舅氏厥行足揚之矣足勸之矣足以勵生而警後足
以式之鄉風之國天下矣敢以表請于執事者李子
曰夫厥行云何許君曰舅力稼穡志孝友體無踰服
口鮮過味聚而能散有而不居李子曰是勤敬儉義
人也表哉許君曰舅宗族睦閭黨愛僮僕惠飲必醉
醉不亂召必徃徃必先來必留留必款李子曰是和
易平實之倫也表哉許君曰舅嘗授散官矣不冠不
帶也曰吾野服逍遙人也嘗賓之鄉飲矣舅不之赴

也曰吾何行而賓于鄉李子聞之乃驚曰是高人也夫自世教之衰也聞假衣冠以銜俗者矣不聞其不冠不帶也聞求賓飲以欺時者矣不聞其賓之而不赴也是二者人之高也表哉夫人之好惡未有不同者也不揚不激不興不與不勸自是權氏子孫不有念其先者乎生者不愧于死者乎鄉之人不有慕之而效者乎是誰勸之也故曰表死以勸生也表先勸後也表之鄉勸鄉也自是風之國風之天下不力儉義者乎和易平實者乎又不有不銜俗不功也按權氏世居澄城趙

宋時有爲元帥者傳至權恩恩生亨亨生通通生允中允中生士賢士賢生宗仁宗仁生定定生濟也濟娶楊氏克相其夫成厥行合葬于斯墓表其大者他見于銘志者不表

勅賜愍節祠碑

愍節祠者贈光祿寺少卿上蔡縣知縣霍侯祠也正德七年冬十有一月賊鈔上蔡攻其城陷知縣霍侯死之其妻劉亦死之事聞 天子痛悼 詔贈知縣恩光祿寺少卿贈其妻爲宜人製文 遣祭建祠 賜額返櫬營葬樹石表間備矣曰其以長子汝愚世

空同集
茂山衛指揮同知次子汝魯送監讀書使文武各紹
之 國家之遇勤 王死事優而至如此嘉靖七年
同知君以署都指揮僉事來掌河南都司印往縣省
謁祠歲乂頽圯謀撤而新之未能也乃伐石立碑垂
所不朽於後人初閹瑾竊柄天下詢詢靡寧於是大
盜乘之扇衆起亂烏合雲擾屬乂安備弛民不識兵
所突崩潰燒聚屠邑煙焰相接賊乃乘勝勒降吏多
棄城走者霍侯固武胤知兵乃增裨濟隍繕甲實庾
申令嚴約慎邏謹謀泣而誓師曰今日有死而已退
而訣諸妻妻泣而曰脫城破妾焉死霍侯曰起臺衙
屋後賊至汝登而望之潰汝則死之已而賊果一騎
來勒降曰大王至矣亟辦牛酒犒侯聞之怒執而戮
之狗于師曰吾不盡磔諸狗奴决不共戴此天賊聞
之乃大怒悉衆而圍之侯禦之力竭而潰賊執之妻
見其潰也下臺而經不死簪諸心拳之入死侯之被
執也詬罵瞋瞪怒髮上指群首愕顧失色氣爲之懼
將釋而用之侯不屈以刃插諸口脅之侯叫罵愈厲
遂遇害頸斷無血白氣縷縷若騰龍乃其面猶生也
於乎壯哉或問上蔡之事李子曰道莫大於忠忠莫
先於節節莫貴於義義莫外乎勇四者人臣之要經

而君子之大行也上蔡兼之矣夫以身徇國忠也之死不變節也舍生取義義也白刃可蹈勇也一死而四懿具者是上蔡之行也曰若是則中庸不可能者何曰禮有之矣君死社稷卿大夫死職守吏死封疆率死戰陳邑雖小有社稷焉宰雖卑受之職矣四境是治封疆守焉起兵拒寇身固率也故戰陳不死是謂弗勇封疆不死是謂弗義職不死謂弗節社稷不死謂弗忠夫上蔡者一死而四懿具者也禮有之矣何也中者正諸禮者也故天下有必死者以有必禮也孟子所謂與民守之効死而勿去曾子所謂得正

而死者是也自教之衰也民見死而不見義於是乎不忠不忠則二心矣二心則不節不節則無恥矣無恥則不勇於是覩面於平時而甘心於患難虎視鯨威而鼠竄偷生者不少矣雖然亦久矣安賊之起漁陽也使非二顏張許者則天理不遽熄而人心不長死哉於乎上蔡無慙四公矣然夫婦偕也義激之然歟抑刑于寡妻者素邪侯名恩字天錫其先盧龍人也高祖成以靖難功陞燕山前衛正千戶曾祖旺調茂山祖敬父贊皆世其官母李氏成化庚寅六月廿九日生侯茂山弘治辛酉舉于鄉明年登進士第拜

山陽知縣丁父憂起補安邑丁祖母憂起補上蔡死
年四十二劉宜人生成化壬寅七月廿二日死年三
十並返荆軻山而葬實有司營其事立石隧道樹坊
門閭咸足報往勸來顯章昭典矣而祠則春秋祀之
賜額曰愍節云贊曰哲人死義能掌斯嗜貪夫苟生
臨難則避惟是哲人死而猶生烈爲秋霜皎爲日星
生爲俊豪死爲神靈惟是貪夫有覩其面彼豈無死
死猶莽薦見者唾罵聞者鄙賤惟帝降衷均恒同若
一念之分堯仁桀虐或如鴻毛或如喬嶽惟手惟獄
我自爲之處峻則高居下者卑巖巖霍侯萬夫之時

懷武曜文英聲懿德單師奮泣孤城抗賊執曰彼衆
我視如蟻執曰彼強視如狗彘刃頸可斷不斷者心
騰氣爲虹奔雷爲音怒爲之颯憤爲之霽上帝是訴
群彪竟擒夫死于君妻死于夫代匪乏賢雙之則無
天子憐悼錫贈蕃優血食茲土有恤其宇禴蒸是承
清酒肥羜威儀儼嚴景光輝耀白馬恍來朱旂大纛
戶風泠泠若色若笑殲妖戡厲我氓攸保

空同子集

卷之四十三終

空同子集

卷之四十四

北郡李夢陽撰 東莞鄧雲霄歛潘之恒菟校

文類五之一 志銘一

封丘 僖順王墓志銘

博平 恭裕王墓志銘

鎮平府大輔國將軍墓志銘

鄆陵府四輔國將軍墓志銘

梁夫人墓志銘 妃劉氏墓志銘

夫人賈氏墓志銘 趙妻溫氏墓志銘

明故申宜人墓志銘

明故封太安人裴母張氏墓志銘

明故奉訓大夫代州知州邊公合墓志銘

右次志銘一十一首

志銘一

封丘 僖順王墓志銘

僖順王者封丘 溫和王子也溫和父曰 康懿王

康懿父曰 周定王周定父是為 太祖高皇帝

初 溫和年四十餘無子憂之時先大夫為 王教

授 王問教授何以能子先大夫對曰仁者必後於

是 溫和戒嚴刻務寬惠削謀計斷酒省慾已而連

生四子 僖順其四也獨肖其父父虬髯乃諸兄不

虬髯獨 僖順虬髯先大夫退而私謂人曰 王之

傳四鎮國乎吾奇其貌已而長男天二三以花生廢

而 僖順果王 王諱同銘母梁夫人也以弘治元

年閏正月二日生二十三年為 王王十四年是

為嘉靖三年十二月七日而 王薨年三十有七耳

訃聞 今皇帝驚悼遣祭議謚管葬乃嘉靖五年

七月十有九日葬汴城南四十里小黃河北實行人

邊彥駱奉 勅經營之者 王為人英雄有才畧然

心恒上人業秦僮媵徵聲樂交豪貴結勢權收置木

石將大治宮室未竟而殂初 王好夜宴鐘鼓管籥
闐喧徹宵雞鳴月墜香粉銷落鳥履雜糅而其興愈
酣或勸焉 王弗之從也竟以此殂妃劉氏六子三
女皆嫡出長子先卒次安湜襲其爵次安汀次安激
次安泖餘未名也銘曰 大明建侯同姓者 王強
支碁布周則蕃昌封丘三傳 僖順逾揚御下以嚴
賓友用禮內獲賢助外有任使 溫和捐館廩無餘
米庫鮮剩錢朱殿蕪圯 僖順承之蹶然而起錦箏
寶瑟玉學珠履享厚中奪斯也常理三世並庶今嗣
則嫡 國祚無疆襲繼綿述生氣是乘而祉永錫

博平 恭裕王墓志銘

博平 恭裕王者 周惠王第十三子也諱安波自
稱思誠子又號述古道入母曰蘇夫人以成化十二
年正月廿七日生嘉靖四年六月十六日薨年五十
一歲訃于 朝輟鐘鼓一日遣行人楊東祭而營其
葬事竣乃復又 勅議謚令書之旌頒焉導之葬咸
典也 王卒之明年是爲丙戌乃葬 王汴城東之
邊村其月七月其日十七日也 王長男封鎮國者
賢而孝豫疑其父墓壘石堅於是爲封爲樹爲饗堂
喪戚而易禮敬而文君子謂 恭裕有後矣初 惠

王生男子二十餘汴老曰氣分別瀉卽其壽德其索
乎會 世子暴殂而 平樂義寧諸王訐獲罪人益
以德難獨 恭裕讀書親友忘勢嗜善修補東書堂
集帖校誠齋錄輯貽後錄養正錄著錦囊詩對諸書
教授蕭雅張鳳等輔之也例初封 郡王米二千石
及 恭裕爲王裁如襲封止千石 恭裕則勤心治
生起宮室置田園備車馬盛賓客饒僮奴褒然爲
諸王首而臺省之官縉紳之夫湖海之客鮮有不造
其門者次第名德必首曰 博平博平云 王有四
男子妃鄧氏兵馬鉞女無出官人戴氏生長鎮國曰
睦柯娶都夫人張氏生次鎮國曰睦橫娶劉夫人又
二子未名封而生女子十二長曰金縣縣主儀賓盛
時升次曰涇陽縣主儀賓楊汝舟次曰單縣縣主儀
賓王恪次曰上蔡縣主未婚餘者幼銘曰用物精多
爽之神明 王七世 祖配天作京大邦奠中建侯
于周 定憲簡靜懿惠承休弘本茂支積厚發光年
嗇德豐厥後之昌龍旂葆羽駕虬驂鳳馮風御氣英
靈輝煌

鎮平府大輔國將軍墓志銘

大輔國將軍者三鎮國將軍之長子而鎮平 恭靖

王之孫也諱同鉉 周定王系有子同安睦則同者
於 定王爲曾孫矣初鎮國娶於楊生兩輔國暨廣
武遂寧二郡君而廣武郡君生左宜人左宜人配按
察副使李某則大輔國者於吾妻實母舅而爲之甥
之夫者義弗得銘辭矣輔國生天順元年七月廿五
日十歲 憲宗皇帝賜名十三封輔國將軍祿八
百石長而婚於賈賈封夫人封夫二年無何卒初鎮
國慈柔罔理於厥家緇人丹士又日來給破費之以
是鎮國雖千石然恒貧及輔國則自立產鉅萬金起
官房長廊曲榭魏樓置鐘鼓美人凡宴二八代進更

歌遊舞絲竹之音諧比亮瀏泛蕙流桂迴雪駐日明

燈旣入樂及徧舞雞鳴月落香粉雜嚶屣履纖沓如

是者四十餘年會 累朝明聖四海平晏歲稔時和

正德十六年正月九日輔國卒年六十五矣先是賈

夫人卒 勅修北岡之塋輔國以卒之明年月日葬

與夫人合生子一十二人安沮安澈安渺安池安滄

安淋安汀安潘安涿安濱安洳安涑俱封奉國將軍

女五人長平陸縣君配儀賓張輔次隴西縣君配儀

賓趙璋三尚幼孫男十俱幼孫女長襄垣鄉君四尚

幼銘曰北岡之南古河之干崇而乾窾而金棺載棲

載安

鄆陵府四輔國將軍墓志銘

四輔國將軍者鄆陵 安僖王孫也 安僖王四子
四曰某封鎮國將軍而娶王夫人鎮國亦四子四者
四輔國云四輔國十歲以例封祿歲八百石貴矣然
純慎不以地高人而好詩書樂與衣冠徒遊嘗讀前
史覽功名之會輒撫卷慨然而嘆曰嗟誠使某備一
官更生普鼎敢多吾哉又見豪貴人千金飾狗馬衣
裘聚名姝罔費惜及義施顧一錢忍弗能與則又歎
曰雙火一膏兩斤獨木是速滅之道耳且貧富命也

豈有義而損者邪於是婚喪弗舉者輔國見之輒與
我酒或棺人曰輔國壽揆厥心行永之占也居無何
輔國病殂矣年四十一耳於是豪貴人反以輔國爲
口實相語曰匪火自焚匪斤自樞輔國生成化丙申
九月十八日卒正德丙子十一月十九日以戊寅年
十二月廿六日葬繁臺之東 今上遣官祭 勅

有司塋焉輔國亦四子某某某俱封奉國將軍四
子咸好文下人士有父風云女一未封銘曰初
帝天造法屯建侯厥子次五俾 王于周實維 文
昭翰垣中州 定王旣殂 憲也則立賢而無後

簡以弟及是生 鄢陵枝敷葉分由鎮而輔父子將
軍於穆輔國年縮操芬賤貨遠奢欽賢懌文於赫宗
藩周也實蕃衆絢驗色群羽知騫繁臺東垠修阡櫛
粉於中者墳輔國將軍

梁夫人墓志銘

梁夫人者封丘 溫和王夫人也父曰梁昇母曰杜
氏夫人生天順八年十一月甲子年十四入 王宮
有姿才多能少言 王異之禮焉入宮十餘年而生
子子十五歲而 溫和王薨薨十餘年於是梁氏子
立爲 王王立乃母梁氏請 皇帝若曰母以子

貴封梁氏封丘 溫和王夫人是時夫人年五十矣
鳳冠雲帔坐於上於是 王暨諸將軍跪奉觴稱壽
退而 王妃暨諸將軍夫人進奉觴壽歲時常而
王問寢視膳日惕惕得夫人懽夫人顧乃病於是
王惶懼涕泣選醫慎藥禱神祈祇冀夫人瘳乃夫人
病愈益增久之痰痿失音 王涕泣跪問張目頷之
而已正德十二年八月廿二日竟卒受封四年矣
今制王夫人卒 皇帝遣官祭而有葬典先是
溫和王薨與妃趙氏合葬洪福岡岡在汴城南四十
餘里而梁夫人葬則穿穴 溫和王塚傍而祭與葬

皆如制葬之日卒之明年五月李某曰往予先大夫
為教授輔 溫和王以是先母高宜人歲時朝于
王宮歸蓋數稱梁夫人云彼予尚童稚然今猶歷歷
記先宜人言梁夫人蓋賢嬪云 溫和王隆準而虬
髯軀不甚修然聲吐者鐘焉先大夫嘗私語曰 王
必壽 溫和五十餘生 今王果六十七歲而薨
今王娶劉氏妃生子二女三皆嫡 溫和王父曰
康懿王康懿王父曰 周定王周定王 高皇帝
第五子也以是 今王年甫壯而行不卑於它王
銘曰有都者嬪淑慎且仁厥美用振始微終伸以發
于天以育以延蕃錫翩翩賁于丘阡

妃劉氏墓志銘

妃劉氏者鎮平 端裕王妃也妃祥符人祖安監察
御史父珣以妃授南城兵馬副指揮初妃以名家聘
王王尚孺成化甲午 王十歲矣例當封然父在又
庶也於是封鎮國將軍而明年劉氏封夫人封夫人
五年是為成化庚子夫人始歸于將軍又五年乙巳
將軍進封 王劉氏封亦進妃然妃罔乃育顧弗妬
育於是盛氏育子某封鎮國將軍天王夫人育子某
今為 王何氏育子某封鎮國將軍張氏育貴池縣

主配儀賓陳中云君子曰螽以和繁膠木詠言瓜摘
則稀黃臺是思故寬惠斯賢多嗣國延女非茲有它
善咸後也 端裕王薨弘治乙丑薨十二年爲正德
丁丑而妃氏卒 王之薨也 勅墓汴城東紅船灣
矣及是 遣官妃祭 勅有司開 王壙合焉 夫王
薨之年十一月十有六日得年四十一妃卒其年七
月廿三日得年五十六合之日正德戊寅十一月六
日也 端裕王父曰 榮莊王榮莊王父曰 恭靖
王恭靖王父曰 周定王徃聞諸父老曰 定王之
蒙化時 恭靖王襁褓云間關夷蠻萬里徃旋乃竟
名壽顯軒縣繁多賢斯所謂栽者培之邪 今王事
母妃謹無殊離于裏其終也哀由衷也茲宗之巨歎
銘曰殊根並蒂齊之義珠沉玉翳雙乃備拓靈播曆
衍所昆承哉繩哉生氣乘

夫人賈氏墓志銘

夫人賈氏者輔國將軍鎡夫人也夫人蓋通許人父
曰賈宏滄州判官母曰王氏判官父恪布政司叅議
叅議父麟封監察御史監察父贊鉛山知縣判官弟
定按察司僉事定弟宗宗人府儀賓賈氏蓋四世甲
郡中而夫人者會又輔國輔國者鎮平 恭靖王孫

而七鎮國者予也七鎮國女弟又配儀賓宗接姻重
戚賈氏貴盛矣而夫人乃顧謙約孝敬沉慧姑田夫
人者嚴人也杖人不百不止夫人事之顧事事當姑
夫人意懽其心輔國者見夫人事事當姑夫人意也
於是悉家事委夫人夫人卽又事事當輔國意懽其
心於是輔國優游日書史酒食與學士遊及有子女
夫人視諸妾子女無殊已子女於是又盡當諸妾意
懽其心而夫人子河詩書文雅謙約孝敬沉慧又盡
如夫人故君子謂輔國有子賈氏有甥諺曰胡葵不
結瓜菽根不產麻言物必有種也今以賈夫人觀之
信哉初夫人童時面盆中嘗見駢幢華蓋之形驚指
謂人及長家人夢人送夫人以霞帔而僉事定時知
絳州亦夢之故賈氏諸女無如夫人貴者然天固定
之矣夫人生成化十六年十二月廿二日以弘治七
年十二月歸輔國正德元年奉 今皇帝誥封夫
人正德十五年正月廿九日卒年四十一歲夫人疾
革也猶力起頽櫛坐子河暨諸子女侍涕泣問夫人
弗答也徐而曰吁予侍汝父二十七年矣今幸全而
終吾目瞑矣夫吾伯叔姊妹者八也支離而夭折者
多矣而吾幸而爲夫人有子若孫吾尚有憾邪河聞

之愈益慟有聲夫人曰河母慟也人孰非死者已而
曰取我服用珍綺諸物來於是盡散諸子女妾者會
輔國亦傍涕泣問夫人曰終事慎而已永久之徒事
觀美無益也輔國又問夫人笑而曰君慮閔損單衣
邪何問之數也竟無悽色哀鳴焉將絕曰取命冠服
來此 國典也吾冠服之見祖宗於地下君子曰夫
死者人之大閑也今觀賈夫人臨絕而不亂女之君
子邪而輔國昨見予則曰夫人蓋名瓊英云曰咸英
者僉事定女也爲時知縣妻時知縣死賊也其妻見
賊而後死之夫人聞之曰吁吾姊見賊而後死乎不
如不見賊而死之爲愈也李子曰予讀書女傳見其
据撫賢淑六種是分未嘗不歎婦材之難也今觀賈
夫人生平之懿臨絕之音不爲全乎雖然其壽嗇矣
與之角者將去其齒乎輔國與其子河詣李子請曰
夫人以卒之年十二月一日葬城東白塔原願先生
銘之李子曰予往聞夫人而嘗歎婦材之難也銘烏
乎辭乃銘之銘曰坎而封者同邪貞而淑者獨邪沉
而輝者珠邪藏而潤者玉邪吁夫人吁夫人

趙妻溫氏墓志銘

溫氏者予友趙澤妻也正德十年趙君拜開封府儒

學訓導挈其妻暨諸子來越五年是爲正德己卯而其妻温氏卒自温之病迄其卒趙君周旋鬱悒踰禮而過情其歛也有鵲立棺首喑喑鳴趙君曰嗟匪妻之靈孰爲斯鳴於是仰天大慟頓地哭已而爲異鵲之歌曰鵲之來爾毛毳毳亡人孔哀鵲喑喑入我戶歷我筵式裂我肝已又爲悼亡詩數百言歌之聞之鮮不泣數行下者或問李子知友者友趙爲斯何也李子曰禮緣情踰情以賢過昔者予也居趙同巷焉游同學焉謀同道焉寢嘗同榻焉又嫂呼温以是知温之賢稔趙千戶者趙君之父也守禦安邊營而趙君來游於郡學於是温事其父母其父若母安焉温生五男子一女趙君學弗能時歸看諸子温感育之俾成人趙君往告予曰微吾妻吾奚免於離憂離憂則中曲亂中曲亂則學弗成及趙訓導也俸薄而屋隘日逐逐熱官送迎歸衙也塵埃滿面目衣振之簌簌土下趙或慚而憂温笑而慰解之曰君慚學成而官卑邪憂在人下逐逐苦邪然命也於是旋旋奔具類器更其土衣或手造嘉飲食勞其夫日爲常於乎若是者足謂之賢不邪賢之則情必過情過則禮必踰禮踰則歌必哀故曰趙之於温也賢之也非獨妻

也溫延安衛指揮之姪女父曰溫某母某氏以成化
丁亥十月生卒年五十有三矣其仲子惇奉其櫬西
葬安邊營古寺山趙千戶墓次銘曰爾夫弗揚行而
有彰矣爾年弗長育而五郎矣爾死異鄉丘首故疆
矣

明故申宜人墓志銘

申宜人者河南右叅政董公妻也父曰申潔潔兄申
洪錦衣衛千戶初董娶於李病而無子乃更娶陳氏
居無幾李卒於是繼娶於申而陳氏則大不平鬧曰
吾儒門女也父兄謂李病無子乃始副室於君然恒
日夜念曰李或不幸卒吾女其繼之矣乃今繼申氏
女邪於是宗族鄉黨聞之私爲董憂曰申入門二女
必鬪爭董之家其索乎暨入門申氏孝敬慈婉言動
循矩家人有過蓋之不以彰背而密訓之曰汝過幸
官人弗知也知之不撻汝邪父之家人悅雖陳氏亦
悅於是以嫡之禮奉申而申乃又不敢以嫡加之陳
恩義若姊妹然於是宗族鄉黨聞之則咸喜相語曰
董中書福人也獲斯二賢年餘陳生子瀾申抱之育
爲巳子巳又生子潤暨女申又咸抱之育爲巳子諸
子女乃咸亦不自知其非申出或唆之曰汝曹實非

申出諸子女不信也已而知之乃顧益母申弗替董之中書也李嘗封孺人矣暨爲戶部員外郎李申並進宜人於是宗族鄉黨乃又咸喜曰賢者必福董爲參議副使四品一十二年弗遷往來逢路申處之無戚容然恒語董第清苦自勵暨董陞今官申亦不爲動嘉靖元年董觀挈家北次郎暨其女婚還也申徧探眷屬徘徊第宅巷陌靡忍去是時厥父年七十餘矣攬衣泣而訣聞者業頗訝之曰申夫人今年二十九耳何得悽楚如此暨抵汴痰發遽卒是年十二月廿一日也明日李子造弔焉二子哭之甚形容摧毀李董通家同進士同寮然猶不知二子非申出董於是始涕泣道故以墓銘請李問申生之年董曰申生成化甲辰正月十有一日小名七姐然前李氏生成化已丑亦正月十一日小名亦七姐申卒之明年是爲嘉靖癸未瀾扶母之櫬歸五月三日葬邑南葛秫務祖塋之次與李氏同云董名銳字抑之玉田人也瀾娶王氏 周府左長史春女潤娶方氏少卿某女女適樂陽指揮某長子也銘曰貴匪盡智壽豈無愚修短者天人或昧諸冠冕佩玉豈無非才哲人其萎於聖攸哀是之謂命君子俟之天有流馨永有取嘖

蕙霜夙零孤雄鳴悲我銘我傷夜臺或知

明故封太安人裴母張氏墓志銘

乾州裴君爲戶部主事時迎其母張氏養于官三年封太安人巳而裴君進郎中陞衛輝府知府乃奉其母行抵衛輝居無何母病尋卒君號哭使使再拜稽顙以幣狀走大梁而見北郡李子曰子故寮也又鄉人尚襄我銘事俾有耀于幽李子乃再拜受之曰嘻是余鄉人之母又故寮也厥胡可辭按狀太安人其先醴泉人也徙爲乾州人父曰張忠母曰周氏太安人之歸于裴也逮事其祖父母父母祖父母見其克

婦道也喜顧謂其父母曰孫媳婦賢而善事我必與吾家其父母退而私又相慶曰父母謂媳婦賢必與吾家乃後裴公中舉爲知縣有美服食太安人對之輒泣曰徃祖父母父母謂裴氏必興也今卽弗大興也然足以養之乃胥弗逮矣知縣公感其言於是嗚嗚相對泣矢曰余決不忝於先人未幾知縣公卒太安人每對裴君語輒又泣曰汝父以不逮汝曾祖父母暨汝祖父母也恒矢曰余厥不忝於先人然卒弗大興也所不齎恨以歿者謂有汝也裴君感其言卒中進士有今官及其拜今封也太安人則輒又泣曰

汝父往雖謂有汝然不及見汝官也言既嗚咽淚數行下於是裴君益感泣砥礪名行是有績于官蓋其封太安人時而知縣公亦贈如其子初官云李子曰予往來道乾州乾州人謂予曰知縣公蓋故有兄弟云然胥異居而蚤亡太安人收其孤養之俾各有妻成家銘曰正統辛酉二月二十六太安人育正德庚午八月十日太安人卒夫諱曰倫字曰秉彛子名曰卿扶櫬西歸合葬于故山厥宮是安

明故奉訓大夫代州知州邊公合葬志銘

奉訓大夫代州知州邊公既卒之四年是爲正德甲戌而其子貢復按察副使提學於河南而奉其母董孺人者來居無何董孺人卒於是邊子仰天大慟絕而蘇曰吁天天乃使母不見貢舉子邪已而曰天天使章上而弗予過也而母胡死於客所已而邊子果舉一子而憤母之不及其子見也則益復大慟絕而蘇曰吁天天乃獨不使母百日延邪乃又靡使貢子舉而及母存於是抱其子告之母名邊羽云邊子奉其母喪還將合之奉訓公墓而詣李子再拜請曰於乎微子孰志微子孰銘於是李子再拜而受之曰於乎微邊氏人其謂予文諛文曰邊氏者故淮陰人也

曰朝用者元末避亂走歷城而贅歷城王家稱王朝
用朝用生王一誠一誠生王文質文質有二子長曰
安次曰寧寧生而異稍長颺言曰我邊氏也呼我邊
寧曰大邊氏必我後其官果至應天府治中乃治中
罔金畜書也輒倍金獲之久之書萬起萬卷樓謂人
曰吾子孫必有以文興者治中生邊節邊節者奉訓
公也字時中號介菴子奉訓公生而更異英特卽六
七歲時見者業識其非常兒云董傑者歷城豪也故
善治中及見治中郎異則益敬治中思與婚一日治
中大置酒會有董公邊郎立偶傍董公董公抱之起
坐膝上曰呼我舅邊郎應聲曰舅我呼汝甥邊郎應
聲曰甥如是者三董公顧治中大笑滿堂皆笑於是
客盡起觴兩公賀而交其襟割之盟兩公復笑客各
復笑醉乃罷散去奉訓公年二十董公女歸焉生十
有七年矣是爲董孺人云董公女歸會治中亡厥金
求焉治中母萬太君者叱止之曰新婦賢不愈獲金
乎於是名新婦金而明年奉訓公爲學官子弟爲學
官子弟人謂必立取第顧久不第第也乃會試又不
第於是可立第者久不第或竟不第也必曰邊時中
邊時中云邊公坎珂者復二十年始有代州之命而

州故稱多豪家罔時後公至州則徧召其長老而集之廷語之曰若民也奈何弗後於是布誠申約陳說分義言意懇恒諸長老無不感動泣下者自是無敢弗役公檢獄簿囚夥以問吏吏曰此逋租者爾曰胡不少寬之吏曰脫則挈家亡矣邊公慨然而歎曰吁未孚而責之暴未期而逆其亡茲豈父母之道哉於是與囚期而釋之使歸已而囚果如期至如是者三年代州大治會中官瑾用事天下以賂行公執古獨不以賂行而忤中謁者已又與御史者拗也坐是免官歸人有咎公執者聞之董孺人董孺人大驚而密解邊公曰斯時何時渠謂歸不官若邪於是日治具佐邊公與鄉人醉游客至則瞿瞿手自辦具然尚惴惴懼不當邊意而邊亦每加禮於孺人每呼曰孺人孺人而其子貢則泣涕告我曰孺人事萬太君敬如其夫事王宜人如事萬太君王宜人者治中妻也茲亦其天性云貢又曰孺人儉稔不理於綺華往受封也有命服矣拜封不復服有時貢請服孺人笑曰孺人卑階爾俟汝大封我則服之此雖其細小然巨者可推矣邊公卒之年爲正德辛未六月乙未距其生景泰庚午四月巳卯得年六十二孺人卒於正德丁

丑閏十二月壬申距其生景泰癸酉正月乙亥得年
六十五初治中以子孤也取王宜人弟之子城子之
孺人卽弟城猶弟也城有婦孺人卽又娣城婦猶娣
也治中歿也城求去城有私畜孺人知之竟不發亦
不以語邊公後孺人病且死會城婦自歷城來匍匐
於終事孺人生二男子長貢也始官博士孺人封貢
爲給事中其父母歷城太常丞其父母在代知荊州
府父卒歷城次曰賦天無子一女子曰劉嫁而寡尋
亦天貢取柴氏繼胡氏妾馮氏生羽者賦取趙氏邊
子謂李子曰貢以母卒之明年月日合母於奉訓
墓墓在祖墓之次祖墓在歷城東二里地曰蓮渠墓
皆枕離而趾坎銘曰謂天無知治中肇之允茲蹈茲
謂天有知代州則屋華隕輝沕懷貞遽畢故材有衆
損苞貴時達碩果之延祺至如掇孺人乃夢垂榴園
如生我所覩歿匪罔愉厥園有楊修阡實良五世爰
利二魂妥是

空同子集

卷之四十四終

空同子集

卷之四十五

北郡李夢陽撰 東莞鄧雲霄歛潘之恒蒐校

文類五之二 志銘二

明故朝列大夫宗人府儀賓左公遷葬志銘

左舜欽墓志銘 儀賓左公合葬志銘

封宜人亡妻左氏墓志銘

處士松山先生墓志銘

隱亭先生墓志銘 高處士合葬志銘

劉處士墓志銘 梅山先生墓志銘

右次志銘九首

志銘二

明故朝列大夫宗人府儀賓左公遷葬志銘
左公諱夢麟字應瑞年四十弘治三年六月三日病
卒葬白塔兒原梨園中葬二十二年而爲正德五年
於是始徙于今墓云今墓去舊墓東北四百步而近
李夢陽曰嗚呼古不修墓乃余今忍銘我外舅焉按
左氏永新逢橋人也語曰逢橋八百左而公曾祖曰
左東吳稱堂下派東吳生仁宏仁宏生左輔是爲知
州公知州公爲南道御史正統間嘗有激劾之章謫
炎方驛丞會喪其胡夫人乃更娶崔夫人崔夫人以

景泰二年五月七日生公炎方驛年數歲知州公起
尉氏知縣從舟行墮水流里所出不死天順五年河
決大梁鎮平恭靖王如尉氏見公以之歸爲其孫廣
武郡君後六年誥授公朝列大夫爲儀賓云恭靖王
周定王第八子於 高皇帝爲庶孫而周定憲時儀
賓最貴重與封疆官分席而抗禮道逢則以鞭相揖
及公爲儀賓乃諸儀賓者業稍稍降矣公出獨張蓋
駿馬見諸所官悉如前定憲時諸所官不平也久之
乃顧獨敬重公以公才行故然公固美貌奇偉作詩
善畫今祿給不以時王孫貧者出或不能具驢車矧

如儀賓矧如我外舅行嗟嗟悲乎悲乎郡君父曰四鎮國將軍溺佛燒丹四方諸以佛燒丹來率輒騙其金資居無何將軍貧積負以萬數無能償而衆債家輒又日謹其門將軍泣欲尋死會公謁將軍出因佯呼曰將軍死矣衆愕然欲散走公乃止之謂曰若等自度將軍力能盡償汝乎且汝等必迫之使死乃已邪衆業懼無敢言者公曰假如人償其半能以全券見還乎衆皆喜諾謝曰願矣於是公乃自往貸諸豪富家緡諸豪富故雅重公乃無不願與緡如其半數公又輒陰易絲絮布帛銅錫等昂其直與債家因又

轉其半三之一而卽以其一轉生息償前諸豪富家歲餘諸所負者皆平矣公病革強起坐會氣絕將軍曰嗟我固謂吾兒爲佛也力主坐葬於是公有四子長曰國璿年十三歲次曰國璣年十一歲次曰國玉次曰國衡年各四歲以卑稚蓋咸莫克成我公葬事公卒十四年而國璿卒葬之又八年國玉卒將葬國璣號哭向母郡君叩頭請曰夫葬者所以妥體魄而棲靈神也乃吾父忍營營逮茲郡君哭曰嗟女夫謂何於是李夢陽趨而進相向哭對曰禮也乃於是謀徙于今墓葬用北首焉然公肌體完也髮鬚不脫落

故衣衾弗朽也是時郡君髮髻髻潘矣率其二子四婦孫四男二女暨厥壻厥女暨外孫環之哭嗚呼公詎知二十年後如此哉父老曰往水退有人爭田邊我田公乃置酒召爭者謂曰第捐其餘與我乃其人慙罷爭亦不侵於我田卽今葬地云蓋左氏三世異墓曰仁宏者永新神公壇墓其彭夫人襄陽墓知州公永新左方墓胡夫人炎方驛墓崔夫人尉氏墓惟公墓今并葬其二子銘曰下不墊黃泉上不見白日改而妥之公以室

左舜欽墓志銘

左舜欽者我外舅第三子也名國玉字舜欽母曰廣武郡君以成化二十三年九月七日生舜欽會 孝宗皇帝改元詔下故其小名曰弘保兒云生四歲喪我外舅十八娶鄭氏女鄭氏女母曰遂寧郡君廣武郡君同母弟也舜欽遂連生二子年二十四以病卒季子曰嗟哉天乎舜欽竟以此死邪仁者不壽乃余則何言矣前余罹首禍黜還尋被鉤織械繫北行厥勢雷轟山崩人人自保竄匿若將及之舜欽獨力疾從酷暑無晝夜行飢渴蓋是時瑾威權熾矣顧頗獨禮修撰康海敬之於是舜欽爲書上康子累數十百

言其大要有四言瑾持天下衡必不以私怨殺人一
又爲天下惜才必不忍殺李子二又康子必匡瑾以
古大臣之業三又康李義交也卽爲之死諍不爲過
四康子爲歛容謝焉旣歸疾愈益甚於是治居于東
野墟中茅屋土垣學辟穀道引之術蓋逾年竟卒以
正德五年六月十三日從父葬于新墓銘曰奕奕大
左肇自逢橋八百雲布英森秀翹爰有東吳實生仁
宏再世不仕子孫以興桓桓爾祖邦之司直秉志不
易中路鍛翻於惟我舅先訓是敦光光巨藩來儀作
賓郡君作配顯王維孫高祖太祖厥封廣武惟茲郡
君淑貞奉姑誕育三雛玉也挺如嗚呼弟玉孰使女
挺孰奪其永急難在心我淚如縷銘于堅石子目其
瞑

儀賓左公合葬志銘

正德十六年三月廿九日我廣武郡君卒旣殯其子
舉人國璣筮地焉遇同人上九同人于郊无悔又筮
方遇坤西南得朋於是偕術人出大梁西南行七十
里至其祖母崔瑩西獲地焉先是弘治二年六月三
日儀賓左公卒於白塔兒梨園中葬矣以弗吉遷之
園東四百步而公長子國璿死葬從之三子國玉死

又從之四子國衡又從之衡母郭氏死又從之至是
國璣盡發其諸櫬奉之西郡君葬既與公合而諸等
墓各如禮從其日爲嘉靖元年二月七日其地尉氏
康墻保坳也郡君父曰三鎮國將軍將軍父曰鎮平
恭靖王恭靖王父曰周定王周定王父是爲 太祖
高皇帝將軍娶楊夫人以景泰二年四月十九日生
郡君生十六年而婚於左左公諱夢麟字應瑞永新
逢橋人也父曰左輔監察御史諱炎方驛丞而繼娶
于崔景泰二年五月七日生我公炎方已而承擢尉
氏知縣攜公尉氏會恭靖王避水如尉氏見公遂以
之婚郡君爲郡君儀賓授朝列大夫籍宗人府云公
修軀偉姿讀書善繪喜吟喜與豪人游是時家貲鉅
萬起第宅闢園田出則駿馬聳蓋僕從都入則引醇
飫肥鳴琴揮管灑然竟日崔之殂也公廬諸墓無何
疾昇歸卒矣年四十耳郡君雖貴人然天性慎惠持
禮奉姑暨夫無殊于家人喚姑崔面背咸姑及庶姑
邵面背又咸姑而夫之殂也屏澤飾卸華綺蔬素終
身怒不至言笑不見斷終其身弗踰闕見人也然早
夭其三子過痛痿痺瀝瀝涎已又亡其女暨邵氏姑
又折其冢婦竟以憂卒年七十一矣是時孫男子左

空同集
六
驂始有婦左駘左騮左駟左騏俱孺孫女初歸于李
昆女夫李夢陽曰於乎賢罔壽壽罔愉老罔偕三者
天下之至哀也矧又隕厥雛公之殂又火厥室廬郡
君雖貴人然孀居憂驚茹荼至矣故君子謂天道無
知使賢者弗穀銘曰田有弗獲黃矢闕之種有弗苑
壅之灌之德有弗食守一俟時嗟我公同茲永茲宅
茲聚茲陽發陰茲驅神役祗由本達支以乘厥生以
融厥明以祥以靈以觀厥成

封宜人亡妻左氏墓志銘

左氏者李夢陽妻也左氏蓋廬陵人曰仁宏者生恭
州知州輔輔生宗人府儀賓夢麟而儀賓婚廣武郡
君成化乙未十月巳丑生左氏於汴邸郡君者鎮平
恭靖王孫王周定王第八子也左氏生十六年歸李
氏李氏者陝以西人也李子父曰奉直君奉直君爲
封丘溫和王教授居汴而挈其子夢陽來初李子幼
婚灼咸不之婚也曰教授微而貧及灼左氏儀賓則
顧獨喜入白其母并郡君氏母郡君乃亦咸不之婚
也曰夫非李教授兒邪微而貧儀賓曰李氏子才竟
婚李氏是時李子生十有九年矣明年爲弘治辛亥
左氏生子枝云踰年壬子李子舉陝西鄉試第一癸

丑登進士第左氏從李子京師會姑舅連喪李子西
於是從而西戊午李子拜戶部主事居京師左氏復
從京師已從通州已未 孝宗皇帝上 聖慈仁壽
太皇太后尊號封左氏安人給 勅命壬戌李子權
舟河西務左氏從河西務明年李子餉軍西夏挈左
氏還過汴是時儀賓母儀賓亡矣獨郡君而左氏翟
冠翠翹揚帔曳裾見焉其行于于也暫而頰頊而流
珠郡君喜已而泣顧謂侍人曰向謂李生微而貧乃
今若此矣因道儀賓語云云愈益泣而慟乙丑李子
進戶部員外郎會 今皇帝上兩宮尊號左氏進封

宜人給 誥命兩命咸美辭云明年丙寅爲正德元
年李子進郎中是年冬尚書洪洞韓公率百官彈宦
官劉瑾等瑾以彈事出李手明年正月驀逐李子奪
其官於是左氏從李子還而潛大梁墟中已巳左氏
兒有婦矣庚午瑾誅明年李子起江西按察司副使
提學是年左氏有孫壬申李子迎左氏於江西左氏
舟河行值椿舟破僅免入江過馬當帆脚打僮人落
江沒及湖口風逆困崖下洄渦中舟突崕石時時響
於是左氏怖欲死計繫之登石免甲戌李子以與江
御史構從理官於上饒而徙左氏星子會訛言賊過

星子於是左氏自徙於潯陽是年李子官復罷道潯陽就左氏泝江入漢至於襄陽將居焉會秋積雨大水堤幾潰左氏曰子不心大梁非患水邪夫襄汴奚殊矣且蘇門箕頰之間可盡謂非丘壑地哉李子悟於是挈左氏歸歸而左氏病踰年骨立死死之日正德丙子五月丁未年四十二矣翌日牲奠左氏烹牲賜腸自團織文理陰陽狀若流蘇垂綬夾耳提襟在上李子觀之哭愈慟曰嗚呼神哉於是賦結腸之篇李子哭語人曰妻亡而予然後知吾妻也人曰何也李子曰往予學若官不問家事今事不問不舉矣留

質酒食稱賓至今不至矣卽至弗稱矣往予不見器處用之具今器棄擲弗收矣然又善碎損往醯醬鹽豉弗乏也今不繼舊矣雞鴨羊豕時食今食弗時瘦矣妻在內無嘻嘻門予出卽夜弗扃也門今扃內嘻嘻矣予往不識衣垢今不命之澣不澣矣縫剪描刺妻不假手不襲巧咸足師今無足師者矣然又假手人往予有古今之愼難友言而言之妻今入而無與言者故曰妻亡而予然後知吾妻也李子買大陽之山嘉靖某年月日葬左氏山下杉棺柏槨負坎抱離四山三水是山也釣州北三十里里曰東張南稱杷

裏右嵩前頰左連具茨李子曰嗚呼匪志曷彰匪銘
曷藏志防虞銘永處矧吾妻矧又吾知吾妻於是志
之而復銘之而刻之石銘曰坎而宮汝藏汝封亦旣
考終汝曰涕約而修伸妍而短屈惟屈與伸由人匪
人繹而思之我心如焚迺竟汝分生雖汝分歿汝共
墳萬祀千秋孰短孰脩汝樂斯丘

處士松山先生墓志銘

大明正德四年六月四日處士松山先生卒年七十
有六歲先是處士便數諸飲食不可口顧惟啜白酒
又足時時腫無力謂余曰歲在蛇矣吾其死乎死則
于銘其墓余止之曰胡言之遽邪然竟死也悲夫處
士有甥曰王泊賢而文實主乃葬事來速銘而處士
弟璠會又以其遺事來赴因并掇拾爲志志曰處士
姓丘氏名琥字伯玉號松山蘭陽人也父陵官至山
西左布政使娶谷氏夫人生四子處士長也幼穎異
於書無所不讀然刻苦因而吐血服白朮丸數十升
愈已又時病目迺棄去以商遊吳中盡發其蘊爲詩
由是知名吳中嘗過丹陽買舟行一人來附舟直入
寢所處士心知其盜也佯落簪舟底而盡出其衣篋
鋪設求之又自解其衣以示無物又俾僮與酌酒夜

則自撫其臥側明日其人去未幾殺人于丹陽城中
被縛乃以其事語人曰吾幾誤殺丘公人服其智經
營四十餘年遂起家至千金顧盡散諸弟男女及族
若所識貧乏者已而金輒復集集而復散終不爲自
計嘗起第大梁東門結亭時木芙蓉菊亭旁更爲詩
先後所爲詩積萬餘數造詞巉削棘澁大類黃韓亦
爲金元曲而比事假托謔浪不恭大抵玩世而泄所
不平酒中竦身按歌其音亮重越裂出宮雜商若敲
金戛石歌竟引滿掀髯而笑人莫之測也居常布衣
簷帽非名士而罕與往來蓋終其身足跡不至公府
云謂人曰我死稱爲松山處士足矣竟以此卒先娶
劉氏生子忠上洛王教授先卒繼朱氏生女適生員
薛鬻側室潘氏生子鏞常自憤其末年家事不遂臨
終曰我死薄斂不用槨棺首第書曰丘松山不瞑目
之柩又曰死卽反葬毋殯鏞奉治命以卒之六日而
反於蘭陽之屯與劉氏合忠有五子四女銘曰丘氏
之先肇自東明曰丘彥德始遷蘭陽傳之仲和實生
士能士能生陵處士三季璠璠及珙璠至叅政珙爲
縣令璠才亦處處士捐館二季先喪惟璠緋挽於乎
處士遠蹈跨時危行德孤敦實斂華獨行不疑人皆

劫劫我約而腴季承以官承志者吾歸于玄所從父母祖

隱亭先生墓志銘

先生姓徐氏鄆城人也名聰字聞博嘗亭隱上於是稱隱亭先生先生力行篤學苦節清修以廉孝聞春母病思櫻非時無從得先生泣禱行彷徨叢薄間遇櫻歸母食之愈人大異之稱徐孝子夫冬林之笋冰溪之魚固非時者也精誠之至氣變以之故巢幕之雀避舍之蚊君子不謂之怪也斯亦足以知天矣今例第不以孝文則第孝子乃爲諸生攻文文又弗第也乃以貢爲醴泉縣學訓導云李子之西也嘗往來奉天之墟是時訓導罷矣乃土人猶往往能道訓導行事李子聞之則慨然而歎曰吾不試故藝向使渠非小試之安知不目其爲兀兀之腐夫訓導之訓其徒也先行而後文制外以兼內講肄以端其習考覈以程其規標的以大其業宏博以遠其思抑揚以厲其志夏楚以鼓其氣久之士憮然若夫也勃而變已翁而從翻然而章訓導乃忻忻喜曰吾志其行矣於是構齋植竹栽冠委裾博習虞周孔之緒而乾州學會官缺檄訓導往攝之久之而乾之徒猶其徒也於

是人始知訓導敬重之謂之才醴泉飢錢叅政者出
帑金千楮訓導賑之或問錢奚捨縣而任學也錢曰
人也孝廉孝則不忍人廉則不受金飢婦有剥齒食
者縣捕之將磔之市訓導見之則泣曰不能使之不
飢而能使之不齒乎非情也夫剥齒救斃耳而今磔
之是以斃易斃也令釋之人聞之愈敬重訓導謂其
才乃使攝其縣事縣以之治於是豪人懼歸我侵田
于學志行矣無何免去或咎之訓導直哂曰子謂我
兀兀腐夫邪其亭濼上也年向衰矣猶聚徒說先王
顧其無馬即大寒暑罔輟也晚病目省延接矣至遇經

生學子則顧繾綣竟日李子曰予之南也嘗度濼矣
於是又獲知濼亭先生云而濼上人蓋至今稱儉鯁
直篤行耽學必首先先生先生宣德乙卯三月廿七
日卒正德辛巳九月一日年八十七歲娶陳氏義士
陳某女先卒繼甘氏壽官甘鍾女年五十三歲亦先
卒甘生徐固舉人女聘舉人趙應式卒側室趙氏生
徐確女適袁曷卒徐生曰於乎吾父幸有聞抑孰知
吾母者母貞懿寡言起家勤矣追遠近矣逮下惠矣
途路瘁矣然弗壽弗貴矣抑孰知母者按徐氏諱保
國初始徙鄆城城西三里許其世墓也以正德年月

日塋隱亭先生於墓而二配合銘曰榱楠在山匠氏之耻和璞終韞玉人其鄙囊穎攸脫乃斂乃歸剗耀刮垢鉤贖探微約之身揆之文以嘏其嗣人先民哉

高處士合塋志銘

高處士者大梁人也名瑾字彥節年六十八歲正德四年二月五日而卒塋鄭門塋矣後十有二年爲正德辛巳而其配侯氏亦卒以明年正月廿七日啓處士窆合焉侯氏少其夫二歲卒之年七十八矣生二男子長曰珣東明縣丞擢知縣又知東光次曰瑒從弟提殺之二女子一歸周鏞驛丞一歸陸澍典膳

珣生三男子長曰爵次曰仲嗣縣學生次曰叔嗣舉人瑒一男子曰愛李子曰孔子有言善人吾不得而見之矣得見有恒者斯可矣予誦其言未嘗不酸心流涕也蓋重傷時俗之偷云夫感贖成真溺華忘實礦金璞玉非其人莫識也乃人見藝材辯博豪縱赫霍輒歛鬻慕效稱賢或峩冠飛纓氣使威喝則又嗟羨敬事之遂今閭閻山野悃朴自脩力田飭行之夫閭沕無聞不見禮於輩流吁時之偷亦甚矣乃余今幸知高處士處士固閭沕人也夷考其行則孝弟儉直者也少事母歲時上壽自歌舞爲懽事其二兄且

趨侍上食而退出則爲執鞭或道傍伺顏色蓋猶事父云長而喜誦書史說先王然不務裘馬不喜酒不畜媵婢嘗歲暮出取負欠割券持一空車歸里人望見盡笑之處士不較也珣丞東明也強逆處士官邸蹙額曰吾自不入公府今公府居邪會舊今代之去問處士曰我孰與新今賢處士默然熟視之已而曰君似弗如也今歎服其直人又言處士家居里巷子弟見之爲起拜肅立僮僕假借不復關白其主人雞豚放猶一家斯益足爲淳風矣侯氏者巖之女也事姑猶夫事母事二嫂猶夫事二兄嫂之子提殺璐也

侯與處士計曰吾幸尚有珣奈何今伯氏無後卒出之獄以百金詣處士謝處士不受詣侯謝侯亦不受曰吾利而金出汝邪君子謂夫婦者足爲媿德駢美者矣而顧咸闇沕閻弗彰吁足傷已足傷已珣之知東光也亦強逆侯侯弗往曰汝父不恬公府吾獨能跋涉就汝邪人言侯卽老親戚子弟罕得見其面禮婦人問荅不踰閫出則擁蔽其面殆斯之類也夫叔嗣曰吾先涓上人也 高皇帝定天下也立幟以定民曰赤幟軍白幟民曰義者傳白幟遂徙大梁從民義生一子九九生一子清清娶李氏生三子聰讓

處士銘曰墨不能朱石不能糜松柏冬榮厥操詎移
居約履躋驗秉觀頤我躋彼蹶彼昭我晦匪財而富
匪爵而貴蹈貞服朴是曰民良高恰布衣孝弟直方
閭里起敬閨人贊襄臧獲循循子孫赫昌今之梁孟
考世莫識不有曰季孰知冀缺不有景升孰欽龐德
我言匪蕪徵此銘石

劉處士墓志銘

劉處士者恭和人也名熙字和皞號敬止於是稱敬
止先生先生歿二十年是爲嘉靖元年而其子潛始
以中江教諭文衡於河南李子之提江西學也嘗議
潛諸生中異之而首拔之於是潛見李子而泣而求
銘其父墓曰於乎潛死罪死罪父歿二十年矣而墓
無銘也潛誠死罪死罪雖然有待也非敢後也李子
曰往吾按泰和也嘗聞若父矣矧潛也遊吾門序曰
劉氏者其先金陵人也後徙泰和之珠林已又徙荷
山號荷山劉氏諱公唯者潛曾大父也號醉德醉德
生元鑣號訥軒訥軒生處士卽敬止也處士少孤不
仕然讀易精詣授之弟弟官新會簿授之子子以之
第授之徒徒多爲名流處士故善酒母嘗病革處士
籲天求身代獲愈於是絕口不酒亦不復肉如是者

幾十年周旋膝下母竟以壽終母之終也處士苦塊
棺側以俟其弟來凡年餘無渝無惰蓋其性方剛得
諸天者如此而族屬有犯或弗浚者必鳴以攻之諸
生弗率者斥去不少貸以是人服其誼而憚其嚴云
處士生某年月日年六十有七歲配蕭氏石岡大家
子與處士齒德相高先八年卒生子一潛也女一適
某潛配歐陽氏生子二女一云李子曰予讀泰之九
三而知天人之交也劉氏其當之矣夫劉氏於趙宋
顯矣科第甲一邑是後寢遠而寢微非謂無平不陂
無往不復者歟夫醉德而下三世約矣然能歛華而
敦實守一履朴堅德固性迄於潛也文行卓如後將
有大聞於時非謂艱貞无咎勿恤其孚于食有福者
歟夫天人判者爾往來進退譬猶符券至數百年而
猶合於劉氏見之故曰予於泰九三而知天人之交
也銘曰耕也或餒時也或萎惟德之綿其悠如泉流
之爲川渟之爲淵流之匪爵渟之匪約君子有穀後
食其福

梅山先生墓志銘

嘉靖元年九月十五日梅山先生卒於汴邸李子聞
之繞楹彷徨行曰前予造梅山猶見之謂病愈且起

今死邪昨之暮其族子演倉皇來泣言買棺事予猶疑之乃今死邪於是趣駕往弔焉門有懸紙總帷在堂演也擗踊號於棺側李子返也食弗甘寢弗安也數日焉時自念曰梅山梅山姓鮑氏名弼字以忠歛縣人也年二十餘與其兄鮑雄氏商于汴李子識焉商二十年餘矣無何數年不來李子問演鮑七奚不來也演曰父母兄三喪曰喪舉矣奚不來也曰七叔父四十四歲始有子而姪也一耳以是大係乎身家已又問鮑七何爲演曰理生飭行訓幼睦族玩編修藝課田省植八者焉已其久也內孚而外化之

是故鄉人質平剖疑決謀丐益者必之焉故效良則芳標美規懿者必曰鮑梅山鮑梅山云正德十六年秋梅山子來李子見其體腴厚喜握其手曰梅山肥邪梅山笑曰吾能醫曰更奚能曰能形家者流曰更奚能曰能詩李子乃大詫喜拳其背曰汝吳下阿蒙邪別數年而能詩能醫能形家者流李子有貴客邀梅山客故豪酒梅山亦豪酒深觴細杯窮日落月梅山醉每據牀放歌厥聲悠揚而激烈已大笑觴客客亦大笑和歌醉歡李子則又拳其背曰久別汝汝能酒又善歌邪客初輕梅山於是則大器重之相結內

空同集 十八
明日造梅山邸款焉汴人有貴客欲其懽於是多邀
梅山梅山遂坐豪酒病損脾今年夏患瘧李子往候
之梅山起牀坐曰弼瘧幸愈第痰多耳然業處分諸
件令演辦酒食俟其起觴客別而還款也先是梅山
作憶子詩曰吾兒屈指一載別他鄉回首長相思在
抱兩週知數日携行三歲隨歌詩筵前與誰論賓主
膝上爲我開鬚眉情偏憶汝老更苦中夜難禁迴夢
時李子因說曰君病無苦念家梅山曰諾諾不數日
而君蓋棺矣嗟梅山梅山梅山又嘗作燈花詩秋燈
何太喜一焰發三葩擬報明朝信應先此夜花重重

輝絳玉乃采艷丹霞愛爾真忘寐聞蛩忽憶家李子

曰君詩佳頓如此梅山曰吾往與孫太白觴于吳門
江上酣歌弄月冥心頓會孫時有綿疾吾醫之立愈
諺曰盧醫不自醫誠自醫之黃岐鵠佗至今存可也
嗟梅山梅山梅山叔牙後也其居歛也號棠樾鮑氏
趙宋時有遇賊而父子爭死者於是所居里號慈孝
里云梅山父鮑珍也珍父文芳文芳父思齊珍號清
逸高尚人也娶王氏生二子次者梅山梅山娶江氏
生一男子二女子男曰若渭今六歲矣梅山生成化
甲午某月日距今嘉靖壬午得年四十九而其櫬還

也演實匍匐苦心以之還厥情猶子也以某年月日
葬某山之兆銘曰崎嶇巖人謂非險淵洄瀕洞猶
謂之淺坦彼周行彼復而迷桃李何言下自成蹊嗟
鮑子胡不汝悲胡不汝思

空同子集

卷之四十五

空同子集

卷之四十六

北郡李夢陽撰 東莞鄧雲霄歛潘之恒蒐校

文類五之三 志銘

寄傲先生墓志銘 明故王文顯墓志銘

明故李大法合葬志銘

賈道成墓志銘 明故何君合葬志銘

明故蔡思賢墓志銘

江都縣丞蘇君墓志銘

明故遙授滄州判官賈君墓志銘

封徵仕郎中書舍人何公合葬墓志

右次志銘九首

志銘三

寄傲先生墓志銘

先生名玉字廷瑞姓韓氏通許縣人也初先生舉於鄉拜郟城知縣郟邑小而賦繁民弗堪也以是困先生憐焉而例體邑政無巨細必關白於所司令始行或見弗之合卽美格閣以是民愈困先生於是則竊歎曰若是奚令爲也凡其細則輒自標號行不盡關白所司於是所司怒督責之而先生則又抗言執理往往無尊異色於是所司謂先生傲轉相擠陵斥先生

生乃棄官歸稱寄傲子而通許俗人士大都宴會酒懽爲適罷官則更放騁而出其官時所營製如冠袍裘馬器皿華綺諸等盡銜耀鄉人曰不如是猶夜行也而先生歸則獨嗜古書奇字性又不酒第閉門坐課兒孫曹於是大爲鄉人所不悅目爲韓怪而先生稔患目又寡言笑對客長揖寒暄而已第瞑目坐於是人益遠先生先生弗動也今俗喪卽人士家崇豪奢文具先生父母喪也則惟據典實廬之墓兩喪者六年以斯觀之其平生足推矣大梁人李知縣者先生姊夫也每招之來會其長子禹卿從空同子游又

其孫輩爲儀賓而其同邑李知府亦罷郡居大梁正德末先生乃徙大梁居焉是時道州何公以都御史巡撫河南聞先生有數學敦禮之叩焉先生辭謝卒不傳嘉靖二年七月空同子會先生於酒筵見其篇文富贍而嘖嘖驚曰寄傲今七十歲矣乃爲此大文邪時李知府亦在坐曰寄傲尚作蠅頭楷字與人札卽片紙吾未見一畫苟也空同子喜曰壽徵壽徵居無何儀賓輩喪其配君禹卿喪其妻而先生亦不起矣於乎於乎是年八月十八日也按韓氏其先項人也諱諒者始遷通許而先生父諱敷嘗爲臨淮知縣

東城兵馬指揮娶劉氏以景泰某年三月廿八日生先生先生配苗氏有子五人女一人壻曰賈希朱孫男女某某卒後兩月禹卿奉其柩返葬通許之塋并其二喪舉云銘曰胡爲而官三歲而掛汝冠胡爲而遷與其二喪同旋於乎孰畀子以賢孰躋之使顛孰嗇之使寒悠悠乎蒼天

明故王文顯墓志銘

王文顯者蒲商也名現字文顯號噫菴子初文顯爲士不成乃出爲商嘗西至洮隴踰張掖燉煌窮玉塞歷金城已轉而入巴蜀沿長江下吳越已又涉汾晉

踐涇原邁九河翱翔長蘆之域竟客死鄭家口先是
王教諭有五男而文顯長父官既卑貧又四弟望我
立以是文顯乃棄士而就商商四十餘年百貨心歷
足跡且半天下然卒老於鹽場文顯之爲商也善心
計識重輕能時低昂以故饒裕與人交信義秋霜能
析利於毫毛故人樂助其資斧又善審勢伸縮故終
其身弗陷於穽羅文顯旣以商起家乃大室廬備賓
祭畢婚嫁四弟各成立王氏固奕奕彰矣而教諭君
能歸顧獨出分其長子文顯則第涕泣自咎責罔攸
繇乃效作五噫之歌歌曰仰彼昊天今白雲霽霽噫

莫慰父心今子之罪噫朝入埽除今出而暮思噫清
風飄裳今明月鑒之噫古有履霜今實獲我志噫歌
畢遂號噫菴子教諭君聞之悔泣父子如初弟珂者
之舉於鄉也會文顯省親歸稱觴遞壽其父顧之喜
曰兄商而利弟士而名乃吾今何憾矣文顯嘗讀史
以孔明取劉璋爲是又謂宋黨禍成於蘇公非程子
激之也間質於其父父則又大驚喜曰現也汝商而
士邪乃吾今何憾矣吳龍者僮也嘗竊於文顯文顯
寬之一日外盜求文顯急執龍刃脅之龍卒不言文
顯匿所其父聞之則又大驚喜曰現也利而義者邪

然天固鑒之邪文顯嘗訓諸子曰夫商與士異術而
同心故善商者處財貨之場而修高明之行是故雖
利而不汙善士者引先王之經而絕貨利之徑是故
必名而有成故利以義制名以清修各守其業天之
鑒也如此則子孫必昌身安而家肥矣按衛推官張
君狀王氏榮河人也諱仲文者元末徙蒲耕於蒲南
十里今稱王家莊是也仲文生彥純彥純生景嚴景
嚴生秉信秉信生王榮賓鄉飲以壽官榮生馨教諭
者也教諭娶張氏以成化五年九月十日生文顯嘉
靖二年五月九日卒年五十五歲娶潘氏生崇仁崇
先崇道州學生也女二長適監生李廷光次聘蔣澄
孫男二人女三人文顯既卒之明年二月某日葬東
原之塋銘曰珠不珍貢而輝汝淵鶴不翼天而唳汝
田我得匪苟我室則盈我有不有我利則成義不入
於穴仁而免於盜兵逾艾而殞於旅茲天邪人邪數
邪

明故李大法合葬志銘

李大法者予門人李瑛之父也名倫字大法祥符人
也而居之杞大法父曰李洪洪父祿祿父讓初洪武
辛巳河灌大梁於是讓挈家走杞水平或勸之歸讓

曰梁杞百里耳何必歸後辛巳河又灌大梁讓子孫
遂免于走明年壬午九月二十日大法生于杞正德
十六年歲又辛巳人詢詢謂河且復來是時瑛以學
諸生寓梁或勸大法胡不俾而郎回杞大法笑曰天
地數若是齊邪已而河卒不來大法娶于崔瑛母也
崔生天順癸未三月八日後癸未是爲嘉靖二年三
月三日而崔氏卒大法素雄飲抗慨無憂少貧嘗爲
親負米力販魚鹽然處之灑如也及崔卒則顧鬱鬱
有戚容於是瑛跽問曰父何憂也大法於是仰天長
吁良久曰嗟吾將去汝曹是以憂也瑛曰兒聞之陰

德陽報父鯁直無私曲惠流於窮人孝弟忠厚鄉間
信之斯必壽大法曰嗟汝諸生也不知天道邪天數
周則易世之人逃焉者寡矣汝母不癸未生癸未死
邪明年甲申二月二十一日大法果卒於是君子謂
大法知天順命李瑛問其師曰仁者有不壽乎曰有
之仁而壽者理也或不者其數也仁而謂必壽則堯
舜周孔雖至今存可也於是瑛吞聲哭曰父未嘗學
而知天順命已而曰吾母之奉姑也姑矇母顛天願
以身代者六年而姑目復開其事夫也罔不敬也然
罔不勤也如是而弗之壽亦數否邪李子曰嗟瑛脩

短非所論人顏跖是也自教之衰也孝弟忠信之士不表於鄉間於是田野篤行率闇焉無聞如大法者夫婦純懿設非其子瑛以文學與縉紳遊卽美誰其知者於乎斯足以觀世矣大法子二長琨娶屈氏次者瑛也娶馬氏女二一適祀生王用中一適溫舉孫男五人女三人以卒之年月日葬杞東郭堤外祖塋與崔合銘曰人也藁爾行則蹶爾杞東門原有穴窆爾配與之同亦云遂爾千秋萬歲佳城蒼蒼

賈道成墓志銘

賈道誠者通許縣人也父曰賈定山西按察司僉事母曰劉宜人以成化甲午四月二十日生道成生踰年而其母亡又二十二年其父亡賈生乃奮厲自力學曰始吾名也父名我曰希朱及字也字我道成斯非望我爲紫陽徒邪於是志洛閩之紹而深之以造乃賈生顧又專易嘗俯仰高下旁觀流形而問李子曰月盈虧者何也李子曰日映之也光之虧也去日遐抑又聞月丸也視側則光虧賈生曰丸之譬謬也夫旣日映之也彼生之哉也懸如弓或又瓦仰何也又嘗問李子聖人觀象而繫辭也三極獨不言象何也李子曰道包象邪動者道邪賈生不答賈生游

郡學廩矣竟弗錄於有司人於是頗咎賈生曰文奚
不時也或曰賈生韜默或曰枯而神短賈生聞之亦
不答乃顧嗜吟正德戊寅九日李子賈生共汎城隅
之陂賈生詩曰波水澄霽澹澹浩浩樓臺蹙沓林石
晶窈霜露載零徑蘭凋槁偉彼松筠哀此衆草人生
幾何榮名是寶辭調高逸李子未之和也第扣舷歌
兼葭之章應焉已而賈生還邑則又作詩曰郊原曠
以脩零霜一何淒飢鴉噪枯桑故城委蒿藜黃鷄輕
四海游子乃念歸懷瞻顧里閭怛焉傷路岐意若自
傷靡遇者人於是頗復狹賈生疑之踰年而賈生病
死矣正德己卯五月二日也年四十六矣賈生卽病
顧猶不輟吟病間日其弟希尚曰吾作一詩自弔誦
畢瞑希尚及從羣弟侍聞之皆泣賈生復瞪目曰斯
何傷古誰不死遂長瞑生嘗自謂滌泉子凡所述稱
滌泉子云亦其不食讖歟初生喪弟喪妹喪繼母妻
喪兄已復喪妻妻知縣韓玉女也無男女遂絕希尚
奉兄柩以卒之年十月十日葬之父墓之側李子曰
予嘗志其父墓矣是故於賈生不復及其家世銘曰
家將興賢者先生家將殃才者先亡其生也登其亡
也崩夫賈氏者顯也積五世矣及其季也纍然衰經

之繼也弔者出而唁者至矣嗚呼道成胡亡胡生吾女銘乎

明故何君合葬志銘

何儀賓文昱者我從孫外舅也一日李子酒會要何不來問何何不來也曰奔母喪耳李子瞿然驚曰乃予聞其母疾曰其母足背丁白而粟母弗謂其丁也爪破之已又難而行丁乃走內攻母竟死後數日何儀賓來我泣而丐銘問之果然又問奚兆何曰吾父歿廿年餘矣母丁之前夜夢父馬而過叱母曰速從我來按何氏其先河間人也後徙汴耕朱仙鎮西

曰全者壽官也生三子長曰何君諱禮字大用娶陳氏先卒再娶慕氏生四子長儀賓也配沁源郡君次文昇次文晨次文星縣學生二女一適劉鷺一爲鎮國將軍夫人初從孫議婚也人皆曰何儀賓賢問何賢曰貴而禮問其父人又皆曰何君賢問何賢曰富而義旣婚也李子之嫂會慕氏歸而又稱慕氏賢問何賢曰默而和李子曰立莫大於禮利莫先於義默莫要於和夫何氏者三善備矣烏得而不興何君生正統五年十二月九日卒弘治十四年二月一日得年五十五歲陳氏生正統九年十月十日卒成化十

七年七月廿八日得年三十一歲慕氏生天順八年七月九日卒嘉靖元年十一月十五日得年五十九歲合葬西韓村之墓銘曰天之道還分地之義完兮還視爾履完視爾美美哉爾阡穿不及泉吉而安兮

明故蔡思賢墓志銘

蔡思賢者夷門之隱人也名鑑字思賢號淨居道人初蔡之冠也筮賓敦典議字焉蔡長揖謂賓曰字我曰思賢賓問何也曰竊聞之鑑以鑑貌人以鑑心非賢不可吾其思之矣其長也勤敏以周物恭儉以裁用和易以混俗廣施以闡仁擯惡以充義敦詩書以

來陳古今以驗往其久也質往者服濡訓者革耻

擯者避德施者親於俗無睽在用靡匱物歲行成君子於是謂蔡子善自字其老也稀省以息慮玄冲以導和游適以陶真歛退以諧物是故身鮮疾疾家無橫非人無詬謗兄弟式睦子貴大州遠遠于于怡然考終斯隱人之行也李子曰予於蔡有三徵焉夫安壽吉者天之所以優善類者也蔡氏備之足稱善人矣孔子曰善人吾不得而見之矣得見有恒者斯可矣予今見之不足占世乎按蔡氏其先潯陽人也名宗先者國初從軍南征渡采石充海船米字號牌總

兼領軍船嘗赴景陵衛投戰檄賞銅鐵五石已論平
陳功又賞銅錢漿酪諸等曰蔡保者隸彭城衛護
周王永樂間調護衛入京而保以鞍匠留侍 王遂
居大梁保配王氏生子四長曰玉次曰琰次曰良又
次曰璟琰配鄭氏生子二長卽思賢次曰銘生女一
侍 周懿王封夫人思賢配蔣氏生子三長曰俊
信陵王典膳次曰俸濱州知州次曰佩思賢生宣德
壬子九月十九日卒嘉靖癸未四月九日得年九十
二歲弘治末嘗 詔拜壽官蔣氏生正統庚申正月
二十三日卒正德乙亥二月十一日得年七十七歲
州之卒也業葬土城南故雞鵝池地於是啓其窆與
夫合是年七月有八日也銘曰蔡子篤行爰以孝聞
嘗冀籲天介福何云蔣也相之執恭守勤奉姑服勞
或至夜分子剖郡符飭躬流芬雙玉載瘞連理同墳
於惟茲野有賢在下過者立馬厥淚攸灑

江都縣丞蘇君墓志銘

江都縣丞蘇君者尉氏柏岡里人也名琇字彥器大
父春生五子第四曰明明亦五子第三曰蘇君蘇君
曰五子第五曰濟衆來請銘其父墓往左生告予曰
蘇君蓋少時一憧憧人也然顧內修攻學學足以第

也然乃竟不第竟爲丞其始爲丞也人告之曰江都土浮俗僞蘇君曰嗟是欲使我先僞逆之邪夫僞逆之必先覘顏色顏色之不得必機關其言語言語之不得必鉤贖其陰細此而不得必有誤中之民矣安有爲人上而忍爲此者邪卒不以僞逆江都民江都民見其丞誠也亦率誠事丞居無何蘇君歸民相挽留泣曰丞奈何歸蘇君曰田荒矣歸欲鋤之耳民曰鋤田勞孰與爲丞君笑曰汝謂丞爲逸乎竟歸徜徉以壽終今按厥子銘狀蓋蘇君生正統三年十一月四日卒正德五年八月五日得年七十三歲左生稱其壽是矣狀曰以明年三月一日葬城西之原又曰蘇君五子皆出自韓氏其父五子皆自王氏其大父五子皆自某氏銘曰東有嘯臺塘如嘯如蘇冢在西斧如堂如其中坎如並峙儼如

明故遙授滄州判官賈君墓志銘

賈君者通許縣人也蓋賈氏世居通許今其墓有三一曰韓朱岡墓一曰郭東墓二墓者賈氏宋元以來墓也纍纍相望一曰三里岡墓則葬君曾祖以下君曾祖諱贊洪武間以人才爲鉛山縣知縣贊生麟封監察御史麟生恪少與婁良齊名語曰婁良賈恪氣

如山岳恪舉進士官至山東叅議是爲叅議君叅議君有三子而賈君長最賢二弟又並賢顯貴無忝於賈君以故通許人推豪鉅族無能先賈氏于是賈氏族聞天下而賈君又自譔次其世系播之人故賈氏諸所名德及諸陰細行可誦說者乃咸由是彰矣故曰成賈氏者賈君也天順間募馬實邊賈君入其馬爲監生已患癰癥鬚眉皓皓爾叅議君會又卒賈君乃力上書辭曰臣疾弗克事事願給空銜養母歿身許之得遙授滄州判官拜于家前叅議君致其仕來居大梁日與老長會約遊大梁人蓋咸望風尊敬之

及君拜官亦日與老長會約遊而大梁人輒又望風尊敬之顧愈甚故人爲之語曰賈君善繼志賈君性靜重少言不喜酒遇酒到口輒推去然坐竟席席上人卽嘵嘵啾啾宣拳臂相狎侮賈君第坐顧竟席席上有歌舞女賈君第坐如無歌舞女卽竟席不見其不衣冠歸也夫鄉飲者天下之大防也今鄉里無賴子弟類鑽刺深衣大帶炫曜而官宦士謂不甚損益而弗省也及賈君爲鄉飲賓乃遂言鄉飲禮頗施行然今亡矣其生以正統七年七月三日卒正德四年五月十七日年六十有八歲取王氏生二子希程希

吳一女爲輔國將軍夫人繼取耿氏生三子希高希
言平定郡君儀賓希冉一女適李鯨君名宏字仲仁
號懶雲居士云銘曰有雲澁澁以觀我時其行施施
卷於違雲矣悲

封徵仕郎中書舍人何公公合葬墓志

信陽何景明爲中書舍人無何卽致仕歸逾年喪
其父已又喪母將葬俾來乞銘余投涕曰余始與景
明友蓋日想見其父母乃今不及見矣志曰封徵士
郎中書舍人何公者信陽州人也諱信字文實其先
居羅田曾祖太山始徙信陽 高皇帝過信陽樹二

旗令曰爲我軍立紅旗下爲民白旗下於是太山卽
立白旗下太山生海海生鑑陰陽典術鑑生何公何
公少使氣大言任謀然數困鮮成事人不之奇也有
盧翁者識之女以女語人曰吾甥三十當有聞是後
有異人產其家公三十果辟爲布政司承差見諸承
差者污賤無藉也又率務裘馬相高何公耻之獨潛
飭行檢誦書久之頗自表見而布政使吳節因竊怪
之特使董大役專出其金公則立辦顧又入其羨金
請賑貸所全活以萬數吳公乃大喜以爲賢引置心
腹成化末關中大飢詔發漕粟萬石至衛口曰河南

發卒輓抵關當是時河南獨南陽汝寧熟於是河南
乃卽發南陽汝寧卒萬人將行何公聞之恚曰今關
中米石不過直金一耳今奈何若是矣乃入言於吳
公曰公誠權出帑金萬使入關糴可遂得萬石乃因
令二郡曰能人出金一卽罷若役仍給粟人一石二
郡人知役且十倍費必踴躍人願出金一而不肯受
粟是公一舉活關中之民弭二郡嗷嗷之口而省粟
萬石矣吳公曰善卒用其計何公於是有名河南然
顧豪亢自負太監汪直至河南河南都御史以下震
懾皆匍匐行上謁會直左右俾都御史劄屬括名馬

都御史業已諾然手戰不能執筆汗簌簌下何公在
旁曰都御史大臣不當煩吏事乃奪筆代都御史劄
其無嚴貴幸如此其後爲會寧渭源二驛丞又有抗
監貢獅番武官及禽巨猾李氏事今皆不詳第詳其
著者焉何公爲人大段厲氣義不欲齷齪與世浮沉
或見尊官大人有弗潔也則退而唾罵之而汪直過
時按察使陳選見直獨長揖不拜何公終身歎慕之
曰陳按察真男子也何公故病足往在渭源病足會
御史行縣簿尉以下當徒走奉輿馬行輒數十里何
公於是仰天竊歎曰嗟乎可以去矣遂卽棄官歸然

貧無馬騎有人資之車一乘馬一匹乃始歸而舍城西溪上卽又日歌吟力田誦書郡人卽無小大咸望風起敬公稱先生不曰何驛丞也乃後何公以子景明封官乃何公不欲稱其官稱曰梅溪居士郡人卽又稱梅溪居士云先娶盧氏卽前盧翁女盧翁有異術嘗以策干石將軍有功已棄之亡歸故不及於難繼娶李氏其父山東人也寓羅山盧家羅山盧家故與盧翁往來善盧翁因竊知李氏女賢及盧氏死乃力主李氏女繼盧氏曰產異人者此女也乃後二氏皆封孺人云盧氏生景韶累官東昌府通判卒景賜舉人而李氏生景暉景明又生女適孟洋今爲行人何公生某年月日卒某年月日年若干歲盧氏生某年月日卒某年月日年若干歲李氏與何公生同歲卒同月以某年月日合葬西山之麓

濟寧于若瀛惠州張萱桐
城阮自華歛畢懋康評定

空同子集

卷之四十六 終

